

ALMAE

UNIVERSITATI DORPATENSI

DIEM XII DECEMBRIS ANNI MDCCCLII,

QUO QUINQUAGINTA ANNOS INDE AB ORIGINE FELICITER PERFECTOS  
CELEBRAT,

PIE GRATULANTUR

SPECULAE IN ROSSIA PRIMARIAE

DIRECTOR ET ASTRONOMI.

ADJECTA EST OTHONIS STRUVII NARRATIO DE PARALLAXI STELLAE ο LYRAE.

PETROPOLI.

TYPIS ACADEMIAE CAESAREAE SCIENTIARUM.

MDCCCLII.

UNIVERSITATIS DORTMUNDENSIS

DILEXIT DEGENSIS ANTONIUS MEDICUS

QD GEDOCVATU AYROS LUDV. AB ORIGINE HISTORIE PRACTICAE

CEREBRAT

Jussu Academiae.

M. Novembr. 1852.

P. H. Fuss Acad. Secr.

Auspiciis IMPERATORUM ALEXANDRI PRIMI et NICOLAI PRIMI,  
UNIVERSITAS DORPATENSIS, iis adjuvantibus, penes quos erat rerum  
administratio, per quinquaginta annos praeteritos, una cum aliis  
disciplinis naturae cognitionem spectantibus, singulari modo  
astronomiam fovit et etiamnum fovet. Specula Dorpatensis ex-  
strui copta est anno 1809, secundum justas normas, quae tum  
temporis non nisi in perpaucis speculis rite erant respectae.  
Instrumentorum splendido apparatu deinceps instructa, inter quae  
tubus ille magnus Fraunhoferianus eminet, unicum sui temporis  
decus, specula haec labores maximi ad doctrinam promoven-  
dam momenti suscipere valebat. Quo officio digno modo semper  
functa est.

Nos vero astronomi Pulcovenses, quorum nomina infra  
subscripta leguntur, tum olim ipsius UNIVERSITATIS alumni, tum  
alibi quidem eruditi, non vero sine studio operum astronomi-  
corum, auctoritate UNIVERSITATIS DORPATENSIS publici juris facto-  
rum, grato animo fatemur, doctrinam, quam hausimus, magna

## NARRATIO

### DE PARALLAXI STELLAE $\alpha$ LYRAE.

At the first publication of my observations of parallaxe of the star  $\alpha$  Lyrae, I have mentioned, that the same were made upon the assumption of the constancy of the distance between the sun and the earth, and that the same were to be considered as a hypothesis, which it was necessary to verify by further observations. In the present paper, I shall give the results of the observations made since the publication of the former, and shall also show, that the hypothesis of the constancy of the distance between the sun and the earth, is confirmed by the observations.

I have now observed the star  $\alpha$  Lyrae, at three different epochs, and have found, that the distance between the sun and the earth, has increased during the time of observation, and that the increase is proportional to the square of the time. This result is in accordance with the hypothesis of the constancy of the distance between the sun and the earth, and it is also in accordance with the results of the observations of other stars, which have been made by me, and by others.

tehunc numeris operis uno simul die votu nostris cibisque rursumq[ue] munera multis ha-  
bemus; nosq[ue] dicoq[ue] inter nos illius dies nonnullas annas colimur; q[uod]cunque dico multo dulcius  
sunt q[uod]cunque monachus nisi monachus emat et in modum muneris munus sacerdotis ea omnia ni-  
spoffit; sicutq[ue] amicis, sicutq[ue] alius amicis, p[ro]ficiet; et ad hanc p[ro]p[ter]eas p[ro]p[ter]ea, q[uod]  
liberatus. H[oc] est enim pars, ut diuina quædam perides locis tenebantur, q[uod]cunque  
voluntate, q[uod]cunque antequam illud desiderio dejetur, amicis q[uod]cunque munera, q[uod]  
contenti ante audito, libet illi. H[oc] est q[uod]cunque autem p[ro]p[ter]ea erit, q[uod]cunque munera, q[uod]  
sunt haec omnia. 171181 anno et ab aliis, q[uod]cunque ait, et ait q[uod]cunque aliis exponit, q[uod]cunque  
liberatus est illius solus, q[uod]cunque ait, q[uod]cunque id est, ingrediens eum muneris exalitq[ue] arguitur  
vita, q[uod]cunque ad eum adire, p[ro]p[ter]ea q[uod]cunque, q[uod]cunque tempore, q[uod]cunque ab aliis q[uod]

**I**llustris Johannes Herschelius in oratione, quam praeses Societatis Regiae Astronomicae  
Londinensis anno 1841 habuit, his fere verbis socios allocutus est: «Congratulor vobis et  
«mihi ipsi, nostra aetate magna illa et hucusque impenetrabilia claustra, quae nobis viam ad  
«mundum sideralem intercludebant; claustra illa, contra quae tam diu frustraque contendimus  
«— *aestuantes angusto limite mundi* — uno eodemque fere tempore tribus variis locis perrupta  
«esse»<sup>1)</sup>.

Alludit his verbis Herschelius ad parallaxes trium stellarum fixarum, 61 Cygni, α Lyrae  
et α Centauri, a tribus astronomis Besselio, W. Struvio et Hendersonio illo tempore pri-  
mum feliciter et tute determinatas. Notissimum est quibus assiduis studiis astronomi, inde a  
Copernico, metam illam, determinandi scilicet intervalli<sup>2)</sup>, quo stellæ fixæ a Sole absunt,  
contingere enisi sint; neque mirandum est tot tantosque labores in hoc propositum impensos esse,  
quo rato non modo argumentum validissimum pro veritate systematis Copernicani nanciscamus,

1) Verba Herschelii anglica sunt haec: I congratulate you and myself that we have lived to see the great  
and hitherto impassable barrier to our excursions into the sidereal universe; that barrier against which we have chafed  
so long and so vainly — *aestuantes angusto limite mundi* — almost simultaneously overleaped at three different points.

2) Ne quid ambigui in scriptione nostra sit, voces *intervallum*, *remotus*, *longinquus* lineare spectabunt spatium,  
quod inter Solem et corpora coelestia exstat; dum *distantia*, *distare* ad solos angulos apparentes inter bina coeli  
sidera conspectos pertinent.

sed etiam normam adipiscamur, qua alia siderum intervalla dijudicentur, itaque primum ponatur fundamentum, in quo aliquando omnis astronomia sideralis exstrui possit. Non quidem in animo est historiam omnium contentionum a clarissimis astronomis trium seculorum in hunc finem susceptarum conscribere; breviter modo loquemur de parte, quam specula Dorpatensis in illis studiis egit.

Antea quam circulus meridianus Reichenbachii Dorpatum pervenit, summum inter speculae instrumenta locum tubus culminatorius octo pedum Dollondii obtinebat. Quo instrumento, rara pro illo tempore vi optica praedito, jam inde ex anno 1814 W. Struve ad investigandas parallaxes fixarum usus est. Elegit sibi in hunc finem, inter stellas boreales, 14 paria ita disposita, ut paucis minutis primis post transitum superiorem alterius stellae, altera in inferiore culminatione per meridianum transiret, et vice versa. Differentiae ex utraque culminatione mediae inter binarum stellarum transitus, oppositis anni temporibus observatae, pro variis elementis in locum apparentem stellarum agentibus correctae, summam parallaxium ambarum stellarum, ab ipso instrumenti situ et ab omnibus fere horologii vitis immunem exhibebant; ideoque magnam deducendorum valorum praecisionem pollicebantur. Neque fefellit haec spes. Observationes primis annis, itineribus ad dimetiendam Livoniam factis frequenter interruptae, inde ex anno 1818 autem majore studio et assiduitate continuatae, jam sub finem anni 1819 ad conclusionem conduxerunt, quam in appendice Vol. II. *Observationum Dorpatensium* legimus: «nulli observatarum 19 stellarum parallaxem absolutam = 1'' esse; in omnibus, si qua est, aliquanto minorem esse 0'',5 arcus». Quae conclusio quanti tum temporis fuerit, eo eluet, quod eo ipso tempore in Anglia astronomi clarissimi, Brinkleius et Poniarius, de parallaxibus integra minuta secunda excedentibus altercabantur. Observationibus scilicet Dorpatensibus primum tuto demonstratum est, parallaxes in genere positiones stellarum fixarum non nisi fractionibus minimis minutis secundi arcus afficere.

Continuatis deinde observationibus usque ad finem anni 1821, W. Struve in Introducione Vol. III. *Observationum Dorpatensium* summam dedit omnium observationum eousque quatuor annorum spatio factarum. Hic jam probat pater, in longe majore stellarum examinatarum parte nullam obtainere parallaxem, quae 0'',1 vel 0'',2 arcus supereret. Duo tamen paria stel-

larum differentias ad  $0''3$  et  $0''4$  ascendentibus exhibebant, quae quum parallaxium legem sequantur et errorem probabilem plus sexies superent, prima certa vestigia parallaxis in loca fixarum agentis manifestasse videntur.

Monuit autem ipse auctor quantitates inventas parallaxium nondum ab omni dubitatione liberas esse. Fieri enim posse, ut diurna quaedam periodus locum habuerit in situ instrumenti culminatorii, quae, quamvis minima fuisset, ut ex aliis observationibus probatum esset, tamen sufficerit ad valores inventos parallaxium aliquantum mutandos. Cui tamen objectioni, ut jam arguit cl. Petersius in commentatione sua de parallaxibus, anno 1847 Puleovae elaborata, graviter se opponit valor numeri constantis aberrationis ex eadem observationum serie deductus  $20''36$ , qui quum  $0''08$  modo minor inventus sit vero valore, Pulcovae a W. Struvio certissime  $= 20''44$  constituto, maxime agit ad augendam fidem parallaxium Dorpati determinatarum, et adeo indicat omnes parallaxes minores potius quam maiores veris inventas esse. Idem cl. Petersius in laudata commentatione docet, parvula membra nutationis, quorum theoria anno deum 1842 ab ipso evoluta erat, in reductione pristinarum illarum observationum Dorpatensium non respici potuisse; quibus adscitis omnes parallaxes paululo etiam maiores evaderent.

Has itaque conclusiones statuere licet:

1. Observationes Dorpatenses annorum 1818 — 1821 certum parallaxis effectum in positiones fixarum primae exhibent.
2. Parallaxes in maxima stellarum parte trium primorum splendoris ordinum infra  $0''2$  arcus sunt.
3. Valores parallaxium tum temporis inventi nondum limitibus circumscripsi sunt ita arctis, ut singularum stellarum intervalla definire valeant.
4. Valent tamen pretia media harum parallaxium ad judicium aliquod generale de intervallis fixarum ferendum.

Ultima hac conclusione, monente patre, 25 annis post doctissime usus est cl. Petersius ad definiendum medium intervallum inter stellas secundi ordinis et Solem.

Circulus meridianus Reichenbachii, anno 1822 in specula Dorpatensi erector, ad nova

astronomiae fundamentorum studia incitavit, ideoque astronomum ab investigatione parallaxium detraxit. Non tamen praetermittendum est haec ipsa studia, quamvis primum ad aliud propositum suscepta, cognitioni parallaxium non omnino aliena fuisse. Observationes enim stellae polaris, numero plus 600, a W. Struvio et Preussio ope circuli meridiani Dorpati annis 1822 ad 1838 institutae, et Pulcovae demum annis 1841 et 1842 calculo severo subjectae, non modo accuratiores praebuere valores numerorum constantium nutationis et aberrationis, sed etiam parallaxem stellae polaris arctis limitibus circumscripta, idque optimo consensu ex observatis tam declinationibus quam ascensionibus rectis.

Constat, studia speculae Dorpatensis novum vigorem et majorem ambitum inde ex anno 1824 adepta esse, quo tubus ille magnus Fraunhoferianus Dorpatum pervenit. In proposito erat instrumento hoc praecipue ad inquirendum in stellarum duplicitum numerum, motus et naturam uti: quod propositum quomodo peractum sit, «*Catalogus novus stellarum duplicitum*» et «*Mensurae micrometricae*» luculenter probant. Per totam periodum 12 proxime annorum, qua observationes in his operibus exhibitae colligebantur, auctor investigationi parallaxium specie quidem alienus fuit. Sed res aliter se habuit; nam in hoc ipso temporis spatio et his ipsis observationibus astronomia, ut ita dicam, ad felicem quaestionis pendentis solutionem maturabatur. Cujus sententiae indoles ut intelligatur, naturam quaestionis hic paululo fusius tractabimus.

Parallaxes aut absolutae aut relativae determinantur. Parallaxem absolutam alicujus stellae angulum nuncupamus, quem radius orbitae annuae Terrae, sub angulo recto ex intervallo stellae examinandae visus, subtendit; relativam vero discrimen inter binos ejusmodi angulos, ad duas stellas pertinentes, quarum alteram multo remotiorem, alteram examinandam nobis vicinorem supponimus. Determinantes igitur parallaxem relativam, fractionem modo parallaxis absolutae cognovimus; quae tamen fractio eo propius ad unitatem accedit, quo major est inter utriusque stellae intervalla ratio. Supponamus exempli gratia duarum stellarum  $a$  et  $b$ , inter se comparatarum, intervalla a Sole esse in proportione 1 ad 10. Propter motum Terrae annum locus stellae  $a$  describet in coelo ellipsem parvulam, eujus semiaxis major est ejus parallaxis  $= \pi$ ; altera stella  $b$ , apparenter proxime sita ad stellam  $a$ , in coelo similem

describet ellipsem, cuius semiaxis autem non nisi  $\frac{1}{10}\pi$  erit. Variationes itaque in situ relativi ambarum stellarum, periodum anni sequentes, non totam parallaxem stellae a offerunt, sed modo  $0,9\pi$ . Quaevis itaque parallaxis relative determinata, etiam si summa cum praecisione enucleata est, paululum tamen a vera parallaxi stellae aberrat, et quidem ita ut semper minor vero valore inventa sit.

Oritur hic quaestio, qua de causa astronomi tot operae navent parallaxibus relative determinandis, quae si certissime etiam constitutae sint, nondum tamen verum intervallum stellarum a Sole exhibeant? Breviter respondendum est: in omnibus investigationibus eam viam ingrediendam esse, qua proxime ad veritatem accedamus. Qui finis ex indole observationum, pro hodierno statu astronomiae practicae, in parallaxibus certius attingitur, si relativas determinamus quam si in absolutas inquirimus. Ex eo enim tempore quo, observationibus Dorpati ope tubi culminatorii institutis, pro majore numero stellarum probatum erat, parallaxes vix ad paucas decimas partes secundi arcus accedere, omnis fere spes parallaxium absolute determinandarum abjici debuit.

Parallaxes nempe absolutae e variationibus deducuntur, quae anni periodum sequentes in positionibus stellarum, ad certa quaedam plana et lineas fixas, aequatorem, horizontem, lineam aequinoctiorum, meridianum, reliqua relatis, locum habent. Hinc jam difficultas ipsa nascitur; positiones enim stellarum ad plana vel lineas fixas relatae, quas earum coordinatas appellamus, variis elementis afficiuntur, quae novissimis demum temporibus tali constituta sunt praecisione, ut variationes annuae coordinatarum, a parallaxi oriundae, nonnisi per paucis centesimis minutis secundi arcus partibus ex illorum erroribus mutari possint. Sed etiam hodierno nostro tempore, quo astronomia practica egregios fecit progressus, determinatio ipsa harum relationum, seu positionum apparentium stellarum, nondum tali gaudet praecisione, ut de minimis fractionibus minutis secundi arcus decerni possit. Ponamus tamen, observationibus frequenter repetitis et summo instrumenti et causarum observationes perturbantium studio, locum stellae pro epocha maxima vel minima parallaxis ad  $0',1$  usque constitui posse, nihilominus cognitio nostra parallaxium nonnisi exiguum incrementum ex his determinationibus absolutis trahet. Ut enim supra vidimus, pro longe majore stellarum numero effectus parallaxis

in loca earum infra  $0''2$  manet. Error igitur  $0''1$ , in positione stellae pro epocha maxima vel minima parallaxis commissus, quantitatem quaesitam aut omnino abscondet aut ex magna parte erroneam indicabit.

Hinc facile intelligitur prosperum successum investigandarum parallaxum in genere non-nisi ex earum determinatione relativa exspectari posse. Positiones apparentes duarum stellarum, paucis minutis primis inter se distantium, ab omnibus elementis in earum loca agentibus, excepta parallaxi, aequo modo afficiuntur, vel, si quae sunt, actionis differentiae facili negotio et perquam tuto computari queunt. Variationes igitur in relationibus mutuis harum stellarum obtinentes, parallaxem earum relativam nullo alieno elemento mixtam exhibent. Agitur modo ut hae relationes, pro variis anni temporibus, ad centesimas usque partes minutus secundi arcus constituantur, id quod ope micrometri fieri posse hodie nobis compertum est. Ante hos autem triginta annos usus micrometri nondum ea, qua in hunc finem opus erat, praecisione gaudebat.

Studiis et ingenio trium imprimis virorum astronomia illam mensurarum micrometricarum praecisionem debet, quae desiderabatur ut investigationis parallaxum feliciter perpetrandae spes conciperetur. Neminem fugit me hic alludisse ad magnos illos progressus, quibus illo tempore immortalis *Fraunhoferus* artem opticam ad hodiernum perfectionis statum evexit, et ad perfectas methodos observandi, quibus, instrumentis ab illo constructis, refractore *Dorpatensi* et heliometro *Regiomontano* utentes, astronomiam practicam locupletavere *W. Struve* et *Besselius*. Quas methodos secuti, ope micrometrorum, duarum stellarum satis lucidarum et non valde inter se distantium relationes mutuas, per aeris bonam conditionem, singulae noctis observationibus intra perpaucas centesimas partes minutus secundi arcus constituere hodie valemus, et quidem sine periculo ullius erroris periodici. Subsunt fortasse in his mensuris minimi errores naturae constantis, qui autem, quum in investigatione parallaxum de parvulis oscillationibus circa medianam relationem proxime constantem agatur, pro hac investigatione in genere nullius momenti sunt. Aeris conditione observationi minus favente, decrescit quidem paululum praecisio mensuris micrometricis unius noctis supra attributa; attingitur tamen et immo superari potest saepius repetitis observationibus. Hinc jam elucet,

quantum determinationes relativae parallaxium praestent p[ro]ae earum determinationibus absolutis. In parallaxibus scilicet relative determinatis tot tantum centesimis partibus minuti secundi errabimus, quot decimis in absolute determinatis. Id modo curandum est, ut stellae comparationis tales elegantur, pro quibus ratio inter parallaxem relativam et absolutam quam proxime ad unitatem accedat.

Concedamus tamen thesem supra allatam, cognitionem parallaxium ex earum determinatione absoluta nonnisi exiguum capere posse incrementum, nonnullas admittere exceptiones. Novimus parallaxem  $\alpha$  Centauri a Hendersonio et Macleario in specula promontorii Bonae Spei absolute determinatam esse; ex qua hujus stellae intervallum singulari certitudine determinatum videri debet. Nihilominus argumentum nostrum hoc exemplo non infirmatur. Etenim  $\alpha$  Centauri parallaxem offert annuam totius fere minuti secundi arcus; cui si etiam errorem  $0.^{\circ}1$  ad  $0.^{\circ}2$  attribuimus, intervallum tamen inter stellam et Solem ad ejus decimam vel quintam partem definitum prodit. Est autem parallaxis  $\alpha$  Centauri totius minuti secundi res in coelo fere unica; nam quotunque stellae hucusque examinatae sunt, parallaxes vel evanescentes vel ad parvas modo minuti secundi fractiones ascendentibus exhibuere; atque nullam aliam stellam in coelo extare, saltem in coelo boreali, quae aequa magnam habeat parallaxem, eo nobis probatur, quod nulla alia stella tot et tam valida propinquitatis ad Solem p[re] se fert indicia. In hac itaque stella cognitio parallaxium incrementum gravissimum ex determinationibus absolutis accepit. Ex altera vero parte negari nequit, hanc ipsam parallaxem  $\alpha$  Centauri limitibus multo etiam arctioribus nobis cognitam fuisse, si in illa determinanda methodus relativa adhibita fuisset; et quidem sine periculo erroris constantis ex incognitis causis, periodum anni sequentibus, orientis, quo positiones absolutae affectae esse possunt. In votis igitur est, hanc ipsam parallaxem mox etiam methodo relativa determinatum iri, et inde confirmationem valoris extra ordinem magni adepturam esse, quae postrema dubia de hoc valore inter astronomos etiam obvia prorsus dissipet.

Alteram jam statuamus exceptionem, determinationem nempe parallaxis 61 Cygni ope circuli verticalis Pulcovensis a cl. Petersio effectam, quae confirmationem generalem eamque egregiam offert quantitatis parallaxeos a Besselio ope heliometri inventae. Ipse auctor dicit va-

lorem inventum praeter exspectationem cum valore Besseliano consentire. Differentia enim am-  
borum valorum infra centesimam partem erroris probabilis unius determinationis Petersianae est.  
Cognitio autem distantiae 61 Cygni observationibus Petersii, summa cura et optimo circulo  
institutis et non minore diligentia quam severitate reductis, vix aucta est; id quod probatur si  
errorem probabilem Besseliānum =  $0.^{\circ}0095$  cum errore probabili determinationis Petersia-  
nae =  $0.^{\circ}080$ , octies majore, comparamus; quibus rite conjunctis error probabilis valoris medi-  
nonnisi ducentesima parte minor fit errore probabili unius determinationis Besseliana.

Nulli tamen desperamus fore, ut aliquando determinationes absolutae parallaxium cum  
earum determinationibus relativis jure contendere possint. Considerantes enim quot quantosque  
astronomia practica postremis decenniis fecerit progressus, spem enuntiare audemus hunc sco-  
pum proximis jam annis attigi. Habemus tubum culminatorium in directione primi ver-  
ticalis collocatum, cuius ope relationes stellarum ad verticem eadem constituere licet certitudine  
et praecisione, qualem in relationibus mutuis stellarum juxta positarum auxilio micrometrorum  
adepti sumus; et ejusmodi praecisionem pollicetur sector zenithalis postremo demum anno a cl.  
Airio in observatorio Grenovicensi erectus. Quae tamen instrumenta non nisi parvum habent  
actionis campum, quum unice pro exiguo numero stellarum vertici proxime culminantium va-  
leant, earumque ita lucidarum, ut observationem per totam anni periodum productam admittant.  
Ope horum instrumentorum itaque cognitio parallaxium tum demum egregie locupletabitur,  
quum ita constructa fuerint, ut facilius in varia transportentur loca, ubi singulae stellae exami-  
nandae prope ipsum verticem per meridianum transeunt, ibique in usum vocentur. Quod ut  
fiat, in votis est.

Tractemus jam breviter de variis methodis determinandi parallaxes relativas et de cogni-  
tionibus, quas astronomia sibi comparare debuerat, priusquam hanc viam ingresso felicem  
eventum investigationum exspectare licebat. Quod propositum summum W. Herschelium,  
astronomiae stellaris fundatorem, primum sedulo prosecutum esse, constat. Etenim coelum per-  
lustravit, omnesque stellas Flamsteedianas notavit, in quarum proximitate alias stellas recogno-  
vit, et ita astronomiae primus ubiores stellarum duplichum catalogos comparavit. Quo facto,  
relationes mutuas plurium parium stellarum per plures annos variis anni temporibus ope mi-

crometri a se inventi mensuravit. Ad hunc laborem spe incensus erat, fore ut in nonnullis stellis ita compositis variationes relationum parallaxis legem sequentes manifestarentur. Quam spem Herschelium fefellisse, notum est. Compensati autem sunt magni ejus labores in hunc finem suscepti cognitione ipsius causae, quae illos pro investigatione parallaxium irritos redidit, cognitione nempe motuum stellarum duplicium circa centrum gravitatis revolventium, itaque systematum stellarum compositarum. Stellae unius systematis in eodem proxime a Sole intervallo moventur, et parallaxis, quae in illis est, eundem habet effectum in locum utriusque stellae. Ad inveniendas parallaxes igitur talia systemata, per se ipsa, nil valent. Quae sententia autem etiam nostris temporibus nondum satis ab astronomis respecta esse videtur. Cujus rei unum modo exemplum afferemus, diligentissimam seriem observationum ab illustrissimo Wrotteslejo, annis 1843 ad 1848, ad inveniendas parallaxes institutam, et anno demum 1851 publici juris factam. Jam a priori judicari potuit, omnia stellarum paria, in quibus mutationes positionum relativarum e parallaxi orientes quaesiverit, nullas hujus generis mutationes exhibere, quia ex probabilitate physice inter se nexa essent. Veritas hujus judicij ipsis observationibus ample confirmata est.

Priusquam igitur in parallaxem alicujus stellae ex comparationibus cum altera stella, in coelo proxime sita, institutis inquiratur, decernendum est has duas stellas comparandas non unius systematis corpora i. e. non physice inter se nexus esse. Deinde, propter majorem effectum parallaxis et inde orientem majorem ejus recognoscendae facilitatem, tales imprimis examinandae sunt stellae, quae certissima indicia propinquitatis ad Solem prae se ferunt. Quae itaque indicia et constituenda et in singulis stellis examinanda sunt. Investigandum porro est, quamnam fractionem parallaxis absolutae quaelibet determinatio relativa secundum probabilitatem exhibere videatur.

Hinc jam elucet, quid sententia supra enunciata significet «maturandam fuisse astronomiam ad investigationem parallaxium». Solutionem problematum huc spectantium molitus est W. Struve, quum primum, accepto tubo Fraunhoferiano, stellis duplicitibus perscrutandis operam navaret. Summae studiorum in hunc finem ab eo susceptorum tum in Introductionibus operum laudatorum «*Catalogi novi stellarum duplicitum*» et «*Mensurarum micrometricarum*» le-

guntur, tum multo certius constitutae inveniuntur in opere ejus recentiore «*Etudes d'Astronomie stellaire*» et in *Introductione operis nuperrime demum editi «Positiones mediae stellarum compositarum»*. Breviter has summas, quantum ad quaestionem nostram attinet, recapitulemus.

1) Enumerationes stellarum in coelo per varios splendotis ordines exstantium, intervallum indicant medium, quo cujusvis ordinis stellae a Sole abesse censenda sunt. Ita docemur, intervallum medium stellae 9<sup>ae</sup> magnitudinis a Sole esse ad intervallum medium stellae primi ordinis circiter ut 33 ad 1. Jam parallaxi mediae stellae primi ordinis = 0,2 posita, mediae stellae 9<sup>ae</sup> magnitudinis parallaxis = 0,006 attribuenda est, seu, pro hodiernis nostris auxiliis, omnino indeprehensibilis evadit. Itaque differentia inter parallaxem relativam stellae lucidae, ex comparatione cum stella 9<sup>ae</sup> magnitudinis deductam, et parallaxem absolutam pro evanescente habenda est. Fieri quidem potest, ut stella comparationis probabilitate propior ad Solem sit; sed etiam tum differentia inter parallaxem relative determinatam et absolutam plerumque infra ipsius determinationis incertitudinem manebit. Aeque tamen accidit, ut stella comparationis remotior sit, quam probabiliter supponatur, atque parallaxis relativa etiam proprius ad absolutam accedat.

2) In stellis duplicibus infra 16" inter se distantibus nexus physicus non est exceptio sed regula. Comparati enim motus relativi cum motibus propriis stellarum, adscito probabilitatis calculo, docent inter 1973 stellas duplices coeli arctici 1702 esse physice nexas, et non nisi 271 mere optice compositas, limitibus magnitudinum pro majore stella in ordine 8,5, pro minore in ordine 11,0 positis. Ultra limitem distantiae indicatum ratio inter stellas physice nexas et optice duplices celeriter quidem decrescit; sed etiam ad distantiam 32" usque multo major erit numerus stellarum duplicium physicę nexas. Inde sequitur mensuras micrometricas, quae inter stellas duplices infra 32" distantes instituantur, nullas in genere exhibere posse parallaxes; et in hunc finem ad majores transeundum esse distantias. Inveniuntur autem etiam extra limitem 32" multae stellae physicę inter se nexas. Priusquam igitur in parallaxem relativam alicujus stellarum paris inquiratur, ex comparatione motus proprii stellae primariae cum motu relativo stellae comparandae cognoscendum est, eas non physicę inter se esse junctas.

3) Quo propior stella nobis est, eo facilius et certius intervallum a Sole ex parallaxi dijudicandum determinari potest. Quousque igitur instrumenta nostra nondum generalem admit-

tunt parallaxum investigationem, eae imprimis stellae examinandae sunt, quae validissima propinquitatis indicia praebent. Indicia autem propinquitatis sunt *a) major splendor stellarum, b) insignis motus proprius, c) pro stellis physice duplicibus, magna apertura orbitae apparentis cum motu velociore in orbita juncta.* Eae itaque stellae inter omnes maximas ex probabilitate habent parallaxes, quae omnia tria indica, vel saltem duo offerunt. Exempla sunt  $\alpha$  Centauri, quae omnia tria, Sirius, Procyon,  $\alpha$  Lyrae, Capella, Arcturus, quae primum et secundum, 61 Cygni et 40 Eridani, quae duo postrema indica conjungunt. Scilicet ex singulo indicio incertius est judicium. Cujus rei luculentissimum exemplum stella illa 1830 Groombr. offert, quae, quamvis motu proprio inter eos, quos novimus, maximo est praedita, vix minimum parallaxis exhibet vestigium.

Via ad detegendas parallaxes his disquisitionibus strata, reliquum jam erat ut de methodo ipsa observationum decerneretur. Duae in genere sunt observationis methodi diversae, in parallaxibus auxilio instrumenti, quale tubus ille Fraunhoferianus Dorpatensis, investigandis prosequendae, methodus nempe differentiarum in ascensione recta et declinatione, et methodus relationum per distantias et angulos positionis determinandarum. Primo intuitu methodus differentiarum in ascensione recta et simplicitate commendatur, et quia stellas comparationis idoneas magis distantes admittit. Quam viam W. Struve initio ingressus est; nam in diariis speculae Dorpatensis plures series reperiuntur differentiarum in ascensione recta in hunc finem observatarum. Ut fidem valorum deducendorum etiam augeret eosque ab erroribus constantibus judicii liberaret, pater in observandis differentiis ascensionis rectae frequenter horologia commutavit, tum pendulo integra minuta secunda indicante utens, tum ope chronometri dimidium vel quarternas decimas partes minuti secundi sonantis observans. Nihilominus mox recognovit, hanc methodum non ad finem exspectatum ducere posse. Agitur enim hic de minimis partibus minutis secundi temporis, aestimatione quadam inter horologii sonos auditos, visus auxilio, constituendis, quae aestimatio arbitrio judicantis nimis magnum spatium relinquit.

In observationes differentiarum in ascensione recta, ope tubi aequatorialis institutas, etiam altera cadit objectio, ea scilicet quod, una tantum stella comparationis adhibita, nullo modo probatum est, instrumentum per tempus inter transitus ambarum stellarum intercedens ne

minimam quidem directionis subiisse variationem. Quae variationes, quum ex gravitate et temperatura in alias instrumenti partes aliter agentibus prodeant, pro variis observationum angulis horariis, variae magnitudinis et signi oppositi esse, itaque differentias in ascensione recta observatas periodice mutare possunt. Posterior haec objectio etiam methodo differentiarum in declinatione, a priore objectione immuni, facienda est; evitatur autem in utraque methodo, adhibitis duabus stellis comparationis, quarum altera stellam examinandam non multo praecedat, altera eam brevi temporis spatio sequitur. Id tamen incommodi inest methodo differentiarum in declinatione, quod pars parallaxis totius, quam declinationes exhibent, ita secundum distantiam stellae a polo ecliptices descrescit, ut in stellis ipsius ecliptices, prope solstitia sitis, nulla fiat, dum coefficiens parallaxis in ascensione recta nusquam coeli multum ab unitate absit<sup>1)</sup>). Cujusnam vero prae- cisionis methodus differentiarum in declinatione compos sit, nostrae observationes de stella Argelandriana (Groombridge 1830) institutae satis probaverunt. Quae itaque methodus, ab aliis astronomis prorsus fere neglecta, maximopere commendanda videtur pro stellis exami- nandis, quae non longe a polo ecliptices absunt.

Relictis his methodis differentiarum, W. Struve unice methodo relationum per distantias et angulos positionis micrometrica constituendarum operam navavit.

Observationes frequentissimae, circa stellas duplices majoris distantiae institutae, docue- rant, et mensuras micrometricas omni qua opus erat gaudere certitudine, et nullam praeci- sionis, inter mensuratas distantias atque angulos positionis, extare differentiam, simulac di- stantia ipsa limitem  $32''$  excederet, intra quem limitem anguli positionis paululo certius men- surentur quam distantiae. Immo, pro distantiis minutum primum excedentibus, mensurae distantiarum paululo certiores evaserant mensuris angulorum. In universum quidem mensurae eo certiores fiunt, quo minores sunt distantiae stellarum. Sed etiam in distantiis magnis,  $1'$  ad  $4'$ , ea est mensurarum fides, ut ad subtilissimam parallaxium disquisitionem tuto adhiberi queant.

1) Eandem restrictionem etiam pro parallaxibus absolutis ex observatis declinationibus deducendis locum habere, necesse est. Itaque usus tubi culminatorii, in directione primi verticalis collocati, et sectoris zenithalis pro investigandis parallaxibus etiam arctius circumscribitur.

Praecisionem observationum generaliter augeri, quo majores amplificationes adhibeantur, constat. Usus autem majorum amplificationum certis conditionibus limitatus est. Primum enim aucta amplificatione restringitur campus visionis, cuius diametru s distantiam stellarum comparandarum definit. Sed ne totus quidem campus visionis eandem praebet mensurarum prae- cisionem, propterea quod optima etiam telescopia in medio campo paulo meliores offerunt imagines, quam in vicinitate peripheriae. Deinde, aucta ultra modum amplificatione, splendor stellarum deminuitur; pro comitibus igitur valde exiguis, maximae amplificationes minoris aestimanda sunt, quam mediae. Denique praecisio observationum paululum decrescit, simulac distantia angularis stellarum comparandarum, per amplificationem aucta, nimium in oculo obser vantis subtendit angulum, quam qui ambas stellas uno intuitu conspici patiatur. Experientia nos docuit, stellas duplices  $30''$  inter se distantes accuratius mensurari, si distantia illarum angularis quadringenties, quam si millies amplificata est.

Ad idoneas stellas, in quarum parallaxes inquireretur, eligendas hae itaque conditions respicienda erant:

1. stellam examinandam validis vicinitatis ad Solem indicis praeditam esse;
2. stellam comparationis non nimis debilem prope stellam examinandam adesse, nec nimis ab ea distantem, ne incertiores evaderent mensurae;
3. stellas binas nullo modo nexus physico ad idem sistema pertinere;
4. stellam satis magnam habere declinationem borealem, ut per totum annum Dorpati commode observari posset.

Quibus conditionibus diligenter perpensis, et praemissis jam investigationibus supra memoratis, W. Struve sub finem anni 1835 in parallaxem  $\alpha$  Lyrae inquirere constituit. Parvula stella magnitudinis 10,5, secundum W. Struve, circiter  $43''$  eo tempore ab  $\alpha$  Lyrae distabat, quam motum proprium stellae primariae non participare, ideoque cum illa non physice nexam esse, comparatis mensuris Herschelianis, compertum erat. Conditionibus igitur in his stellis optime satisfactum erat.

Ipsò anno 1835 series observationum de parallaxi  $\alpha$  Lyrae instituendarum copta est. Primo quidem tempore W. Struve has observationes, propter itinera erigendae speculae

Pulcovensis causa suscipienda et varia alia negotia, non eo studio, quo in animo fuerat, prosequi potuit. Inde factum est ut, ad finem usque anni 1836, nonnisi 17 observationes completas collegerit, quas in fine Introductionis in *Mensuras micrometricas* publici juris fecit. Jam in his paucis mensuris, imprimis distantiarum, effectus parallaxis sese manifestavit. Computo facto, parallaxis = + 0"125 inventa est. Quem valorem, errorem probabilem = 0"055 vix duplo superantem, non satis certe determinatum existimavit ipse auctor. Ideo observationes continuare constituit.

Initium hoc observationum parallaxes relativas spectantium, quamvis finem propositum nondum prorsus assecutum esset, nihilominus ab astronomis maximi aestimatum est. Docuerunt enim hae mensurae, quaenam via ad detegendas parallaxes fixarum ingredienda esset, atque astronomos ad spem finis, in quem per secula frustra enixi erant, brevi temporis spatio attinendi erexerunt. Satis est unam immortalis Besselii opinionem hic afferre, qui quum primum *Mensurarum micrometricarum* exemplar accepisset, statim consilium suum stellam 61 Cygni iisdem methodis prosequendi literis die 26. Aug. 1837 conscriptis ita Dorpatum mandavit: «Maxime delectatus sum conamine tuo parallaxis  $\alpha$  Lyrae determinandae. Exemplo tuo ad aemulationem instigatus, sine mora duas stellas,  $\alpha$  Bootis et 61 Cygni, observare incepi.» \*)

Si igitur primae illae mensurae de parallaxi  $\alpha$  Lyrae institutae nil aliud astronomiae profecissent, eo solo optime de scientia nostra meritae essent, quod Besselium ad memorabiles observationes de parallaxi 61 Cygni ope heliometri Regiomontani instituendas excitaverunt.

Heliometrum pro constructione sua magnas distantias proxime eadem dat certitudine, qua minores. Anguli positionis autem non eadem, qua distantiae, obtinentur praecisione. Besselius ergo ad investigationem parallaxium solas distantiarum mensuras adhibere constituit. Angulorum mensuris ita rejectis, confirmationem veritatis ex mensuris distantiarum inter stellam examinandam et duas stellas comparatas quaesivit, alteram  $a$ , 462" distantem, alteram  $b$ , 706" distantem, et quidem ita ut earum directiones in ipsa stella primaria angulum proxime

\*) Haec sunt ipsa Besselii verba: Lebhaft hat mich der Versuch interessirt die Parallaxe  $\alpha$  Lyrae zu bestimmen. Ihr Vorgang hat inzwischen zur Folge gereizt und ich habe sogleich angefangen zwei Sterne,  $\alpha$  Bootis und 61 Cygni, vorzunehmen.

rectum formarent. Initium observationum Besselius die 18 Aug. 1837 fecit. Quibus usque ad mensem Octobrem anni insequentis continuatis, summam earum eodem jam anno 1838 in *Schumacheri Nuntio (Astron. Nachr. No. 365)* astronomis communicavit. Postea series harum observationum ab ipso Besselio et Schluetero usque ad Martium mensem anni 1840 producta est. Jam ex tota copia observationum, 188 comparationes stellae *a* et 214 stellae *b* amplectente, parallaxis 61 Cygni a Besselio ea, quam in omnibus summi hujus nostri seculi astronomi laboribus admiramus, subtilitate deducta est:

ex comparationibus cum stella *a*, = + 0,3584  
 " " " " " *b*, = + 0,3289;  
 vel medio numero = + 0,3483 cum errore medio = 0,0141, vel errore probabili = 0,0095 \*).

De observationibus circa parallaxem  $\alpha$  Bootis inceptis nil publici juris factum est. Literis mense Martio anni 1838 Dorpatum missis ipse Besselius patri mandavit, etiam hanc stellam inde ex mense Augusto 1837, ad parallaxem constituendam, a se observatam esse. Nescimus autem num postea hae mensurae etiam continuatae sint; quod si factum est, certe operae pretium foret summam earum astronomis communicari.

Dum haec Regiomonti agebantur, etiam observations Dorpatenses de parallaxi  $\alpha$  Lyrae non quiescebant. Quamquam observations hujus periodi frequentibus itineribus Petropolin factis interruptae sunt, nihilominus usque ad mensem Augustum 1838, mensuras 96 completas relationis inter  $\alpha$  Lyrae et stellam comparationis colligere successit. Illo jam tempore iter in Germaniam a patre suscipiendum, deinde transmigratio ejus in recens conditam speculam Pulcovensem finem his observationibus imposuere; neque, pro multis negotiis, computus earum ante mensem Septembrem 1839 perfici potuit. Hoc demum mense W. Struve summam observationum suarum conventui Academiae Scientiarum Petropolitanae in comminatione exhibuit inscripta «*Additamentum in Mensuras micrometricas*», quae anno insequente publici juris facta est.

\* Doctissimus Petersius observations Besselii parallaxem 61 Cygni spectantes retractavit (*Bulletin de la Classe physico-mathématique*. Vol. 8. No. 4), ita quidem ut vim et coefficientis thermometrici, postea ab ipso Besselio certius constituti, et errorum quorundam variabilium, qui senioribus observationibus heliometricis indicati videbantur, respiceret. Qua via parallaxem hujus stellae = + 0,3602 ± 0,0121 reperit.

Diximus totum numerum mensurarum a patre de parallaxi  $\alpha$  Lyrae factarum 96 fuisse, quae, cum omnes completas relationes inter ambas stellas exhiberent, 96 aequationes pro parallaxi ex distantiis deducendas, et totidem aequationes ex angulis positionis observatis formandas offerre debuerunt. Attamen W. Struve solas distantiarum mensuras ad parallaxem determinandam adhibere constituit, quum cognovisset angulos positionis ex causis, quas in *Aditamento* p. 25 exposuit, erroribus quibusdam obnoxios esse signi oppositi in angulis horariis oppositis, quippe qui errores, quamvis parvi, ejusdem ordinis ac ipsa parallaxis esse poterant. Contra, mensurae distantiarum nulli errori, anni periodum sequenti, obnoxiae sunt, simulac effectus temperaturae in revolutionis cochleae micrometricae valorem certe constitutus est. Effectus hic pro instrumento Dorpatensi certissime investigatus erat, et ne minimus quidem error ex ejus incertitudine residua in determinationem parallaxium transire potuit. Rejectis jam angulis positionis, solae 96 mensuratae distantiae, per methodum quadratorum minimorum, parallaxem  $\alpha$  Lyrae dederunt = + 0"2613 cum errore probabili = 0"0254.

Determinatio haec ea vero caret confirmatione, quam in parallaxi 61 Cygni Besselius ex duabus stellis comparatis assecutus erat. Fides igitur, ab astronomis in deducta parallaxi  $\alpha$  Lyrae posita, potius subjectiva erat, prout quisque magis minusve de praecisione observationum sibi persuasum habebat. Sententiam hanc elegantissime enunciavit Joh. Herschelius in oratione, in introitu hujus commentationis laudata, ita loquens:

«Ne longus sim, quaestionem de priore determinatione parallaxium, inter hos illustres, «generosissimos sibique amicissimos aemulos pendentem, ita verissime constituendam crediderim. «Observationes meridianae a Struvio annis 1818 ad 1821 institutae prima vestigia problematis «resolvendi continere videntur; vestigia tamen leviora, quam quae aliud vindicent, praetér «spem, fore ut problema non longinquo tempore studio astronomorum cedat. Mensurae ejusdem «micrometricae de parallaxi  $\alpha$  Lyrae institutae, toto anno prius inceptae et in summa per lon- «gius tempus extensae sunt, quam mensurae Besselii de parallaxi 61 Cygni. Jam inde ex ipso «initio mensurae illae indicia parallaxis offerunt, quae indicia, continuatis per longius tempus «observationibus aucta, eam fidem adepta sunt, ut magis probetur, in observationibus paral- «laxem pronunciari, quam errores instrumentales vel fortuitos latere, qui simili modo ac

«parallaxis in mensuras egissent. Ex altera parte Besselii mensurae, toto anno serius coepiae  
 «et per paulo brevius temporis spatium continuatae, compactum quoddam et consistens evi-  
 «dentialiae exhibent sistema, ex duabus observationum seriebus mutuo se confirmantibus deductae.  
 «Quae evidentialia ita rem suam agit, ut nullum relinquatur aliud dubium de veritate parallaxis  
 «inventae, nisi quale in multis rebus etiam manet, quae humane loquendo certae aestimantur.  
 «Cum ita de veritate hujus investigationis nobis persuasum sit, augetur fides in altera investi-  
 «gatione ponenda, et eo inducimur, ut etiam hanc accipiamus et probemus secundum evidentialiam  
 «suam. Quae si deesset auctoritas, haesitaremus ratam accipere parallaxem sine ulteriore con-  
 «firmatione ejusdem indolis.»

Confirmanda igitur erat parallaxis  $\alpha$  Lyrae ex observationibus Dorpatensibus deducta. Cui proposito jam ex eo inde tempore animum attendi, quo magnum telescopium Pulcovense, aperturae 15 pollicum anglicorum, mihi in usum traditum erat. Pro variis autem aliis laboribus plus minusve urgentibus, anno demum 1851 hoc problema aggrediendi otium mihi datum est.

In hac investigatione eadem stella comparationis usus sum, quae Dorpati observata erat. Adest quidem, praeter plures exiguae, etiam altera stella, dimidia tantum magnitudinis unitate nostra debilior et 2,5 circiter ab  $\alpha$  Lyrae distans; attamen ex comparata hac secunda stella parallaxem determinandam nullum fere praecisionis incrementum nancisci posse censui. Pro majore enim distantia et minore hujus stellae splendore, ad illam observandam minores adhibendae fuissent amplificationes, unde singulae mensurae multo incertiores evasissent iis, quas stella altera comparata offerebat. Neque egebant observationes nostrae confirmatione ex comparatis duabus stellis petenda. Persuasum enim mihi erat, mensuras angulorum positionis seu directionum eadem praecisione et certitudine gaudere ac distantiarum, simulac directio motus diurni pro positione tubi, in qua observationes ipsae institutae erant, rite determinaretur. Aequationes igitur ex directionibus observatis formanda non minus valebant, quam aequationes distantiarum; modo coefficiens parallaxis in angulis obvius non nimis inferior erat coefficiente in distantias agente, vel vice versa. Fieri enim potest ut, in stellis eclipticae vicinioribus examinandis, stellae comparationis ita sitae sint, ut aut anguli positionis, aut distantiae neutrum quam parallaxi mutentur, vel ejus effectus in altera coordinata proxime evanescat. In stellis

autem polo ecliptices vicinis, sicut  $\alpha$  Lyrae, magnum inter coefficientes discriminem extare nequit. Calculo posthac instituto, maximus coefficiens parallaxis in directionibus  $\alpha$  Lyrae ad nostram comparationis stellam relatis, pro media epocha mensurarum 1852,25, inventus est = 0,974, in distantiis = 0,910.

Supra dictum est, incertitudinem angulorum a patre mensuratorum inde ortam esse, quod directio motus diurni stellarum, per motum tubi circa axem polarem effectum determinata, gravibus objectionibus obnoxia fuerat. Quam incertitudinem ut evitarem, directionem motus diurni semper ope stellae ad filum per campum tubi immoti incidentis constitui. Quae methodus, quamvis plus temporis et laboris requirat, in instrumento Pulcovensi tali gaudet praecisione, ut error probabilis motus diurni ita determinati vix ad unum minutum primum accedat, qui in distantia 44'', quae interest inter  $\alpha$  Lyrae et stellam comparatam, nonnisi octagesimam partem minuti secundi circuli maximi efficit. Elucet errorem probabilem ex incertitudine motus diurni prodeuntem in nostra investigatione omnino negligi posse.

Excepta hac certiore methodo determinandi motus diurni, inde observationum mearum proxime eadem manebat, quae a patre in *Mensuris micrometricis* atque in *Additamento* exposta est. In universum tamen numerum mensurarum cuiusvis noctis paululum auxi. Inde factum est, ut error probabilis observationis singulae noctis per medium minor prodiret, quam in observationibus Dorpatensibus. Computo primo absoluto, errorem probabilem anguli una nocte determinati, partibus circuli maximi expressum = 0'',106 inveni, distantiae = 0'',093. In hoc computo suppositum est omnes mensuras eadem gaudere praecisione, quam tamen valde secundum aeris conditiones mutari constat. Ex *Additamento* discimus errorem probabilem singulae distantiae Dorpati mensuratae medio numero = 0'',154 fuisse. Inde sequitur, pondera relativa distantiarum Pulcovae et Dorpati mensuratarum esse ut 2,7 ad 1. Aucta haec praecisio partim, ut dictum est, majori numero mensurarum observationem unius noctis constituentium attribuenda videtur; partim etiam majore vi optica tubi Pulcovensis atque majore facilitate exiguae stellae comparationis observandae effecta est; partim denique inde provenisse videtur, quod observationes maxima ex parte in vicinitate meridiani instituere mihi licebat, dum telescopium Dorpatense, propter pedis constructionem minus idoneam, stellarum majoris declina-

tionis borealis, sicut  $\alpha$  Lyrae, observationes non nisi sub majoribus angulis horariis instituere patiebatur.

Incepi observationes de parallaxi  $\alpha$  Lyrae faciendas die 18 mensis Septembris 1851, et usque ad diem 1 Decembris 1852 mensuras completas collegi 51, quarum 13 sunt anni 1851, ceterae anni currentis 1852. Mensurae per totam periodum aequabiliter fere distributae sunt, neque in iis faciendis epochae maximorum parallaxis effectum prae aliis respectae sunt; de quibus ante primum annum observationis absolutum nil certi mihi compertum erat. Ante hunc enim terminum nullum institui calculum, ne ipsae mensurae judicio praeconcepto afficerentur. Lacuna tamen observationis est 7 fere hebdomadum, inter diem 25 Januarii et 10 Martii, quo nempe tempore coelum continuo nubibus obductum observationes recusaverat. Sed in medium hoc fere tempus (4 Febr.) maximus cadit parallaxis effectus in distantiam negativus, unde parallaxis ex distantiis deducenda paululo minus certa evadere debuit. Ut jam lacuna illa impleatur, in animo est observationes etiam per hiemem praesentem continuare. Pro parvo autem errore probabili cuiusvis mensurae, 51 illae observationes hucusque collectae jam nunc parallaxem  $\alpha$  Lyrae satis arctis limitibus circumscribere valent.

Subjeci itaque has mensuras calculo severo, in quo faciendo primum supposui omnibus observationibus eandem attribuendam esse praecisionem. Aequationum duae series, ex distantiis et directionibus deductae, tria quaevis continent sua incognita 1) correctionem relationis mediae suppositae, 2) correctionem motus proprii  $\alpha$  Lyrae, ex comparatione observationum Bradleianarum cum positionibus Dorpatensibus deducti, 3) parallaxem  $\alpha$  Lyrae.

Nuncupantes:  $\epsilon$ , correctionem distantiae mediae =  $44''200$ , pro epocha media observationum, quae est 1852,25, suppositae;  
 $\sigma$ , correctionem anguli positionis medii =  $144^\circ 40'$  pro eadem epocha accepti, partibus circuli maximi expressam;  
 $\eta$ , correctionem motus anni proprii in distantia;  
 $\mu$ , " " " in angulo positionis;  
 $\pi$ , parallaxem ex distantiis deducendam;  
 $\pi'$ , " " " angulis " " ;

aequationes finales per methodum quadratorum minimorum deduximus has:

ex distantiis:

$$51,00\varepsilon + 4,78\eta + 11,17\pi = -0''08$$

$$4,78\varepsilon + 7,67\eta + 2,93\pi = +0,14$$

$$11,17\varepsilon + 2,93\eta + 15,83\pi = +2,03;$$

ex angulis:

$$51,00\sigma + 4,78\mu - 9,33\pi' = -0''75$$

$$4,78\sigma + 7,67\mu + 0,06\pi' = -0,52$$

$$-9,33\sigma + 0,06\mu + 30,67\pi' = +3,87.$$

Unde

$$\varepsilon = -0''040, \text{ cum pondere } 41,0 \text{ et errore probabili } 0''015$$

$$\eta = -0,024 \quad " \quad " \quad 7,0 \quad " \quad " \quad " \quad 0,035$$

$$\pi = +0,165 \quad " \quad " \quad 12,9 \quad " \quad " \quad " \quad 0,026$$

$$\sigma = +0,018 \quad " \quad " \quad 45,5 \quad " \quad " \quad " \quad 0,016$$

$$\mu = -0,079 \quad " \quad " \quad 7,2 \quad " \quad " \quad " \quad 0,040$$

$$\pi' = +0,132 \quad " \quad " \quad 28,9 \quad " \quad " \quad " \quad 0,020.$$

Duo pretia inventa parallaxis,  $\pi$  et  $\pi'$ , intra limites errorum probabilium inter se convenient. Quibus rite conjunctis habemus parallaxem  $\alpha$  Lyrae = +0''144 cum errore probabili = 0''016.

Quamvis ita parallaxis jam satis arctis limitibus inclusa est, certitudinem tamen disquisitionis incrementum capturam esse existimavi, si observationibus minus accuratis minora attribuerentur pondera. Duae praesertim sunt causae, cur aliquot observationes nostrae minoris aestimandae sint reliquis. Primo nempe tempore mensurae nec eodem ordine, nec etiam prorsus eadem methodo instituebantur ac postea. Serior observationum periodus, qua omnes mensurae secundum certam normam perficiebantur, inde ex Martio mense hujus anni incipit, atque a priore periodo spatio illo 7 hebdomadum abest, per quas, ut supra memoravimus, coelum continuo obductum observationem impediverat. Altera jam causa, cur nonnullae men-

surae minus certae evaserint, aeris nempe conditiones minus faventes, nostrae seriei cum omnibus aliis observationibus astronomicis communis est. Pondere bonarum mensurarum = 1 posito, omnibus observationibus per aeris conditionem minus faventem institutis, quae in diario semper adnotata est, pondus =  $\frac{1}{2}$  tribuere duxi; neque hac via virtutem earum nimis deminui mihi probatur. Idem etiam pondus =  $\frac{1}{2}$  omnibus prioris periodi observationibus ex altera causa indicata convenire censui. Mensuris denique hujus periodi per aeris conditionem pejorem institutis pondus =  $\frac{1}{4}$  assignare placuit. Adhibitis his jam ponderibus, retrahavi aequationes et has deduxi aequationes finales:

ex distantiis:

$$38,50\epsilon + 7,07\eta + 9,39\pi = -0''05$$

$$7,07\epsilon + 5,66\eta + 3,13\pi = +0,15$$

$$9,39\epsilon + 3,13\eta + 12,18\pi = +1,35;$$

ex angulis:

$$38,50\sigma + 7,07\mu - 3,24\pi' = 0''00$$

$$7,07\sigma + 5,66\mu - 2,29\pi' = -0,63$$

$$-3,24\sigma - 2,29\mu + 22,99\pi' = 3,29.$$

Unde pretia incognitarum obtinentur:

$$\epsilon = -0''034, \text{ cum pondere } 26,8 \text{ et errore probabili } 0''015$$

$$\eta = -0,009 \quad " \quad " \quad 4,2 \quad " \quad " \quad 0,037$$

$$\pi = +0,140 \quad " \quad " \quad 9,4 \quad " \quad " \quad 0,025$$

$$\sigma = +0,029 \quad " \quad " \quad 29,0 \quad " \quad " \quad 0,014$$

$$\mu = -0,095 \quad " \quad " \quad 4,2 \quad " \quad " \quad 0,037$$

$$\pi' = +0,139 \quad " \quad " \quad 22,1 \quad " \quad " \quad 0,016.$$

Error probabilis singulae bonae observationis, seu qui unitati ponderis convenit, hic pro distantiis =  $0''0764$  evadit, pro angulis =  $0''0756$ . Nullum igitur in bonis observationibus exstat praecisionis discrimen inter mensuras distantiarum et angulorum. Praeterea ex deductis

parallaxis pretiis, quae duae ponderum hypotheses dant, elucet, ipsa haec pretia nonnisi minimas subitura esse variationes, etiam si pondera relativa observationum amplius mutentur.

Pretia haec postrema quantitatum quae sitarum sine dubio certiora sunt prioribus. Attamen correctio motus annui proprii  $= -0''095$  in angulo positionis nimia inventa videtur: tanta enim incertitudo motus proprii annui, constituti ex comparatis positionibus absolutis Bradleianis et Dorpatensibus, 70 annorum intervallo sejunctis, vix admittenda est. Ex parte igitur quantitas inventa  $\mu$ , errori residuo nostrae determinationis attribuenda est, quod etiam ipso errore probabili  $= 0''037$  hujus quantitatis indicatur. Nec est cur hanc incertitudinem miremur, quippe quae ex singuli anni observationibus prodierit. Ponamus itaque et  $\mu$  et  $\eta$   $= 0$ . Aequationes finales hac conditione denuo resolutae, parallaxem praebent ex distantiis  $= +0''140$ , ex angulis  $= +0''145$ . Unde apparet errorem residuum in motu proprio supposito nullam proxime habere vim in valorem parallaxis. Conjectis jam his duobus valoribus, habemus parallaxem  $\alpha$  Lyrae ex observationibus Pulcovensibus deductam  $= +0''143$  cum errore probabili  $0''0135$ .

Comparemus jam hanc parallaxem et eam, quae ex observationibus Dorpatensibus  $= +0''2613$  cum errore probabili  $= 0''0254$  deducta est. Differentia  $= 0''118$  duorum parallaxis valorum prope triplum est differentiae  $= 0''043$ , secundum errores probabiles utriusque determinationis exspectandae, seu accuratius  $0''118 : 0''043 = 2,75$ . Nulli vero dubitamus, quin haec differentia ex parte maxima incertitudini pretii Dorpatensis attribuenda sit. Nostra enim parallaxis in consensu valorum, ex angulis et ex distantiis, itaque per methodos observandi prorsus inter se diversas deductorum, argumentum habet veritatis omnium gravissimum; cui accedit quod ipse error, ex probabilitate in nostra parallaxi timendus, dimidius vix est erroris probabilis determinationis Dorpatensis. Inde jam dici potest: observationibus W. Struvii effectus parallaxis in locum  $\alpha$  Lyrae certissime indicatus est; quantitas tamen inventa plus exspectatione a veritate aberrat, sed non tanto ut differentia inter valorem Dorpatensem et veram parallaxem ex erroribus observationum residuis explicari nequeat.

Differentia, ni fallor, inde paululum aucta est quod, nulla ratione habita conditionum plus minusve faventium, omnibus observationibus Dorpatensibus idem attributum est pondus.

Quantum pondera considerata agere possint, eo jam elucet quod, si unam modo distantiam, horis matutinis 12 Februarii 1837 in conditionibus sine dubio maxime inquis observatam et extra ordinem a ceteris differentem, rejicimus, parallaxis tribus minutis secundi centesimis minor, seu  $\pm 0''231$  evadit. Praeterea error probabilis parallaxis, quem in *Additamento* legimus, paululo augendus videtur. Plerumque enim a patre singula nocte duae series mensurarum sese quam proxime excipientium sunt factae, ex quibus duas deduxit aequationes, quas nullo modo inter se pendentes in calculo accepit. Saepius autem compertum est, omnes mensuras micrometricas unius noctis, ex peculiari astronomi vel instrumenti affectione, vel ex alia causa incognita, uno eodemque sensu turbari. Duae igitur mensurae unius noctis non nisi singulam aequationem praebere debuerant, atque loco 96 aequationum, quales schema Dorpatense offert, nonnisi 58 habemus. Rejecta insuper notata illa observatione 12 Februarii 1837, aequationes 57 superstites denuo per methodum quadratorum tractavi, atque parallaxem  $\alpha$  Lyrae  $= \pm 0''230$  cum errore probabili  $= 0''030$  inveni. Error probabilis singulae aequationis  $= 0''138$  evasit.

Habemus jam tres determinationes parallaxis stellae  $\alpha$  Lyrae nulli graviori objectioni expositas has:

W. Struve (1839),  $\pi = \pm 0''230$  cum errore probabili  $0''030$

Peters (1847)  $\quad \pm 0,103 \quad " \quad " \quad " \quad 0,053$

O. Struve (1852)  $\quad \pm 0,143 \quad " \quad " \quad " \quad 0,0135;$

quibus rite conjunctis evadit

parallaxis  $\alpha$  Lyrae  $= \pm 0''1549$  cum errore probabili  $0''0120$ .

Cui parallaxi intervallum inter Solem et stellam respondet 1332200 radiorum orbitae Terrae, ad quod percurrendum lumen tempore 21,01 annorum eget.

Unam juvat hic addere considerationem. Mirandum certe est ex eo inde tempore, quo observationes Dorpatenses et Regiomontanae docuerunt, quaenam via ad inveniendas parallaxes ingredienda esset, 14 annos praeterisse, in quibus cognitio parallaxium relativarum per exiguos tantum fecerit progressus. Hucusque enim nonnisi tres stellae  $\alpha$  Lyrae, 61 Cygni et 1830 Groombridge hac via examinatae sunt; et quidem in nulla alia specula praeter Pulco-

vensem et Regiomontanam, quantum novimus, hujus generis investigatio post Besselium et W. Struvium tentata est. Spatium hoc temporis permultis iisque splendidissimis inventis et diligentissimis laboribus excellit, in variis astronomiae partibus; quo probatum est contentiones astronomorum ad augendam scientiam non modo non decrevisse, sed e contrario majorem ambitum et vigorem adeptas esse. Unde ergo in hac periodo apparens illa neglectio problematis ex omnibus sane gravissimi astronomiae sideralis? Ex parte, alia studia astronomos ab hoc problemate difficile tractatu et indefessum laborem exigente detraxere; sed magis opinio egisse mihi videtur, sola telescopia, maxima vi optica praedita, tali investigationi paria esse. Cui opinioni non omnino assentiri possumus. Etenim videndi difficultas in multis stellis comparandis nulla vel exigua est, et usus maximarum amplificationum pro investigatione parallaxum exceptio est, non regula. Agitur modo ut observationes satis accurate instituantur, quod ope minorum telescopiorum, aperturae 6 pollicum, fieri posse pro certo habemus. Quid alia exempla afferam, quum integra apertura heliometri Regiomontani 6 pollices vix excedat. Omnia igitur telescopia ita valida, ut stellas comparationis nonae magnitudinis ad propositum satis distincte exhibeant, et quae perfecto apparatu micrometrico instructa sunt, ad parallaxes intra paucas minuti secundi centesimas determinandas adhiberi possunt. Quin praestant minora telescopia, ex. gr. aperturae 6 pollicum, pro hac investigatione p[ro]ae maximis ea ratione, quod in genere idoneas stellas comparationis magis distantes eligere admittant.

Utinam pauca haec verba eo faciant, ut astronomi ad investigandas parallaxes relativas magis incitentur, et ope excellentium organorum opticorum, quibus hodie multae speculae exornatae sunt vel brevi exornabuntur, cognition spatiorum coelestium in fundamento solido et lato exstruatur. Progrediantur astronomi ea via, quam aperuit et munivit specula UNIVERSITATIS DORPATENSIS!